



IHA SUKU UAGUIA KOMUNIDADE HOTU SERVISU IHA KONSTRUSAUN

PNDS

Hamutuk ita
dezenvelope nasaun

Outubru 2014

Feto mak lidera jestaun konstrusaun projetu PNDS (Baucau, Viqueque)

Suku hirak implementa PNDS iha faze primeiru oras ne'e hahú ona konstrusaun, iha faze ida ne'e númeru involvimentu feto aumenta, liuliu hala'o kna'ar hanesan ekipa jestaun suku hodi jere programa PNDS ne'ebé tama iha sira nia suku.

Iha suku Abo (Quelicaí, Baucau) maluk feto sira involve ona iha oráriu servisu rotativa, sira hi'it no lalin fatuk, kahur simentu, kuru be' e no prepara enkuadramento edifisiu foun comunidade nia ne'ebé atu harii. Iha suku ida ne'e comunidade sira decide atu konstrui postu saúde, sentru comunidade multi propóztu no rehabilitasaun estrada.

"Maluk feto sira barak liu mak involve iha konstrusaun ida ne'e duké mane", dehan Sergio Freitas, Kordenadór Dezenvolvimentu Sosiál ba distritu Baucau no Manatuto, Ekipa Apoiu Terenu PNDS. Alende feto, maluk ho deficiente sira mós involve iha servisu konstrusaun ba suku ida-ne'e.

Maluk feto sira mós iha kna'ar ida ne'ebé mak importante tebes iha papél kordenasaun iha nivel suku no aldeia. Suku Maluro, (Quelicaí, Baucau) iha Ekipa Jestaun Suku (EJS), órgaun ida responsabiliza ba ekipa implementasaun projetu (EIP) hotu-hotu mesak feto deit. EIP nia papél atu prepara proposta projetu inklui dezeńu, planu orsamentu no oráriu ba implementasaun, Alende ne'e ekipa ida ne'e mak jere projetu nia implementasaun tomak inklui mós orsamentu. Iha Suku Maluro total membru ba EJS hamutuk ema 11 no maioria na'in 9 feto.

Konstrusaun ba sentru komunitária multi propóztu foun, sistema be'e no postu saúde dezenvelope lala'is los, maske Suku Maluro lokaliza iha área ne'ebé mak remota los, ida ne'e realija tanba comunidade tomak nia partisipasaun.

"Ida-ne'e di'ak tebes bainhira hare maluk feto sira partisipa no lidera konstrusaun iha PNDS, husi ami nia monitorizasaun, ita bele hatete katak PNDS bele implementa ho susesu iha fatin remota sira, comunidade sira hotu kontente tebes ho PNDS tanba ida-ne'e mak projetu ba dahuluk tama iha sira nia suku, iha tinan barak ona programa ida seidak tama". Hateten Simon Whitehead, Asesor Senior ba Jestaun Finansiál Públiku ba Ministériu Administrasaun Estatál.

PNDS iha meta 40% ba feto sira nia partisipasaun iha etapa prinsipál sira ba prosesu. Iha faze pilotu nian persentajen ba partisipasaun tomak feto nian bainhira define prioridade mak 40%, no 39% iha enkontru sosialisasaun nian.

Progresu

Pilotu: Remata ona

Faze 1: Etapa 10 / 11

- Halo reuniaun responsabilizasaun, no transfere fundus infra-estrutura ikus (50%)
- Kompletu konstrusaun, no entrega ba ekipa operasaun no manutensaun

Faze 2: Etapa 8 / 9

- Finaliza kontratu ho comunidade, no implementa projetu
- Transfere primeiru prestasaun hosi fundus infra-estrutura (50%), no hahú konstrusaun


Faze 3: Etapa 4

- Treinamentu ba ekipa jestaun suku no fasilitadór suku sira




Prioridade sira

Faze 1



Faze 2



- Saude
- Bee Mos no Saneamentu
- Edukasaun, Cultura e Desportu
- Agricultura, Siguranca Alimentar no Buka Moris
- Dalan, Ponte no Kontrolo de Cheias
- Solidariedade Sosial
- Sektor Seluk



Komunidade Suku Manlala no Suku Leohat hala'o enkontru akontabilidade 50%

Atu hetan informasaun tan:
www.pnds.gov.tl
info@pnds.gov.tl

Atu fo imi nia hanoin:
keixa@pnds.gov.tl

Komunidade Suku Soilesu Partisipa Ativu iha PNDS (Bobonaro)

Estrada mak sai hanesan prioridade as iha suku Soilesu ba tinan ida-ne'e. Iha identifika prioridade suku komunidade tomak deside konstrusaun estrada ligadu ba Aldeia Ai Aras no Aldeia Soilesu mak sai hanesan prioridade. Maluk Feto sira Partisipa iha Konstrusaun Estrada.

"Hau sei enkoraja komunidade hotu atu partisipa iha implementasaun konstrusaun estrada ida ne'e, tanba estrada ida ne'e ajuda tebes komunidade husi aldeia Ai Aras no Aldeia Soilesu ne'ebé iha poténsial bo'ot tebes iha area holtikultura", hato'o husi Romaldo Leto Mau, Xefe Suku Soilesu.

Konstrusaun estrada foun ida-ne'e nia distánsia 3,5 km, iha konstrusaun komunidade tomak partisipa tantu ferik-katuas, feto-mane no inklui mós juventude sira. Orsamentu ba konstrusaun estrada ida ne'e hamutuk \$39,500.

Partisipasaun komunidade iha implementasaun programa PNDS iha suku ida ne'e merese hetan apresiasaun tanba iha konstrusaun estrada ida ne'e iha grupu hamutuk 7 mak hala'o servisu no kada grupu kompostu husi ema nain 15 to'o ema nain 20. Jestaun hala'o servisu mak ekipa husi grupu 7 ne'e loro-loron servisu kolektiva no area servisu mak la hanesan, ezemplu kada grupu iha responsabiliza atu ke'e estrada to'o metru 15 ou metru 20, depois hotu muda ba fatin seluk ne'ebé mak define tia ona tuir oráriu ne'ebé termina ona.

Servisu prinsipál ne'ebé sira halo mak ke'e rai hodi taka rai kuak no ke'e rai hodi loka estrada tuir estandarte ne'ebé iha, pelumenus karreta bele liu ba mai. Estrada ne'ebe konstrui husi komunidade bele asesu ona transporte públiku.



Fongtil Kandidata PNDS Ba Premiu Nasoins Unidas Ba Servisu Publiku

Forum ONG Timor Leste (FONGTIL) ofisiálmente apresenta programa PNDS hanesan kandidatura atu hetan prémiu husi United Nations Public Service Award (UNPSA) ka organizasaun Nasaun Unidas ba servisu publika, (24/10/2014).

"FONGTIL ho vontade tomak apresenta PNDS ba kandidatura tanba PNDS hanesan programa ho konseitu foun no aplikavel, no komunidade rasik mak deside, planea, implementa, hodi kontinua halo manutensaun". Hato'o husi Arsenio Pereira da Silva, Diretór Ezekutivu FONGTIL.

Kritériu organizasaun ida atu kandidata programa modelu hanesan programa PNDS ba iha UNPSA mak organizasaun ne'e tenke independente katak la indika ligasaun ruma intermus ajuda finanseiru husi governu ka ajénsia relevante ba iha sira instituisaun. FONGTIL hanesan órgaun independente ida ne'ebé kredibel tebes no libre husi konsekuénsia ida ne'e, mesmu asina akordu hamutuk ho governu atu halo monitorizasaun ba programa PNDS maibé la iha indikasaun apoiu fundus ruma husi governu ka ajénsia relevantes ne'ebé mak koopera iha programa ida ne'e.

